



MAJ 2017. • List RMU "BANOVIĆI"  
BESPLATAN PRIMJERAK

# RUDAR



**Termoelektrana Banovići:  
USAGLAŠENI STAVOVI  
FINANSIRANJA TERMOBLOKA**



**TTU „Energetik“ d.o.o. Tuzla:  
ISPORUČENI PRVI PROIZVODI**



**U razgovoru sa banovićkim rudarima:**

**Zadovoljni  
statusom u Rudniku**



**Zapošljavanje u Rudniku:**

**Po okončanju konkursa  
244 radnika pozvana  
na ljebarske preglede**

RECEPT ZA ZDRAV KOLEKTIV JE ZADOVOLJSTVO UPOSLENIKA

## Rudari otvoreno o statusu u Rudniku

Pitate li rudare kako je živjeti sa rudarskom platom i raditi 300 metara pod zemljom svi će reći da nije lako, ali da je to njihov posao i da ne mogu svi raditi u administraciji i apoteci. Mijenjali bi se oni, kako kroz šalu kažu, ali samo za veliku platu i udobnu fotelju, u suprotnom NE.

Rudarstvo je rezervisano samo za one „jake“ u glavi spremne na mogući rizik nepredvidljive prirode. U današnje vrijeme poziv rudara zasnovan je uglavnom na potrebi za opstankom, ali vremenom nesvjesno se pretvara u ljubav. Svi rudari, kako oni pod zemljom tako i oni na površini, naučili su da časno rade i vole svoj posao. Većina ih potiče iz rudarskih porodica gdje se rudarstvo uglavnom prenosi već nekoliko godina unazad, ali ima i onih koji su kao najhrabriji prvi prihvatili ovaj poziv.

Izlazak sunca ne vide, jer tada su na radnom mjestu u otkopnim poljima nekoliko stotina metara pod zemljom. Jedina svjetlost koja do njih dopire u tim momentima je oskudna svjetlost rudarskih lampi koja, realno, ponekad osvjetli i govori više nego svjetlost dana.

SRETNO za njih nije samo pozdrav već iskrena želja drugu komoratu.

Uz Božiju pomoć i vjeru svakoga dana u jamu „Omazići“ već trinaest godina silazi kombajnista i prvi kopač Nesib Mešanović. Kroz godine rada posmatrao je stalne promjene u Rudniku, pa tako i sam razvoj jame, odnosno historijski prelazak sa klasičnog na mehanizovani način otkopavanja.

- Prvi silazak u jamu nije bio jednostavan. Ni dan danas nije svejedno, ali čovjek se navikne. Cijeli radni vijek radim na čelima. Na samom početku radilo se na klasičnim čelima u uskom prostoru. Teret je prelazio preko ruku rudara i sve se moralo napraviti u zadatom roku bez

neželjenih posljedica. Revolucija za podzemnu eksploataciju desila se 2013. godine ugradnjom mehanizovanog čela kada smo dobili najsigurniju jamu i znatno lakši rad. Ubrzo smo savladali „čuda“ moderne tehnologije i samostalno krenuli u posao. Napretkom smo zbunili i Poljake koji su nekoliko godina nadzirali rad mehanizovanog čela - pričao nam je Nesib.



Posebno je pohvalio odnos Uprave prema zaposlenima, ali i suživot sa komoratima, koji su solidarnost spremni iskazati u svakom momentu. Sjetio se slučaja kada je prvi Ramazan ispostio u jami. Veliko olakšanje bili su mu rudari koji su se našli pri ruci u svakoj situaciji pogotovo kada je u pitanju fizički rad.

Ruku pod ruku sa Nesibom spreman za silazak u jamu bio je i Mersudin Haskić. Prvi kopač i član čete za spasavanje prije tačno deset godina prvi put je sišao u jamu. Rudarstvo je za njega naslijede i bez straha bi ga prenio i na svoje potomke. To je posao koji zna raditi i na koji je ponosan, kao i na činjenicu što kao član čete prvi pritekne u pomoć kada su u pitanju vanredne situacije.

Deset godina u jami nije kratak period, čovjek se potpuno prilagodi. Neobično mi je kad me rasporede na površinu da radim, jer pod zemljom je moj zanat i dole su moji komorati za koje sam odgovoran. Možda je lakše raditi napolju, ali mi smo navikli ovako. Kako se među sobom volimo šaliti u jami je svaka smjena ista i uvijek se servira večera. Ali od 2007. godine do danas i ta večera mijenja svoj ukus, „hljeb sa sedam kora“ postaje mekši prije svega uvođenjem nove i modernije mehanizacije. Olakšan nam je rad i svakim danom situacija je bolja. Imao sam priliku biti i u jamama drugih rudnika i iz tog razloga s pravom mogu reći da smo daleko ispred njih - kazao je Mersudin.

O anegdotama i pošalicama koje su specifične za rudare moglo se razgovarati cijeli dan, ali pokretanje gumene trake bio je jasan znak da je vrijeme za posao. Sljem na glavu, krampu u ruke i putovanje u utrobu zemlje moglo je početi.

Nesib i Mersudin sišli su u jamu po „banovičko crno zlato“, ali u isto vrijeme svoj dio posla obavljali su i oni na površinskoj eksploataciji. Svi oni kao kolektiv zaslužni su što je banovički ugalj prepoznatljiv brend, a Rudnik jedno od unosnijih preduzeća u državi.

Površinska eksploatacija Rudnika već godinama radi punom parom. Svakim danom otkrivaju se nova i eksploatišu već postojeća nalazišta uglja.

Od prvog dana na Marionu 5 jednom od najstarijih ali vrlo produktivnih bagera površinskog kopa „Turija“ radi Nezir Mujezinović. Kao prvi bagerista već petnaest godina radi na otkrivanju i iskopavanju uglja, te utovaru kamiona. Kaže, na posao se sve ove godine nije imao razloga žaliti.



Teško je shvatiti ljude koji su nezadovoljni u jednom od najboljih Rudnika. Razumijem postupke i napade režimskih medija i onih koji jednu ovakvu firmu žele u svom „timu“, ali kako razumjeti nezadovoljstvo onih koji imaju redovne plate, regrese, godišnje odmore, uplaćene doprinose. Niko od njih ne bi znao nabrojati još dvije ovakve firme u državi. Ispoštovani smo maksimalno. Slažem se da plate mogu biti veće, ali to dolazi kao rezultat napornog rada, a mi smo na pravom putu. Siguran sam da će za nekoliko godina i sa realizacijom projekata po tom pitanju biti puno bolje - rekao je Nezir.

Po ko zna koji put u toku radnog vremena da natovari svoj damper kamion od 100 tona na red je došao Amir Glibanović. Trebalo je „baciti“ još jednu turu do pauze za doručak „serviran“ na platou u rudarskim kućicama. Iako ga samo šest kalendarskih godina dijeli od penzije svoj posao radi sa istim elanom kao ranije.



Ovo je moj kamion, vozim ga od kada je došao i tretiram kao svoje vozilo. Nas četvorica, svako u svojoj smjeni, odgovorni smo da kamion uvijek bude u ispravnom stanju i da ga takvog jedni drugima predamo u narednoj smjeni. Dobro ga čuvamo pa kvarovi i nisu česti, a i kamioni su prilično novi. Skoro svake godine na kopove ih dođe po nekoliko. Nabavljamo i širimo mehanizaciju, ali i proizvodne ambicije. Uglja, hvala Bogu, ima na sve strane - riječi su Amira.

Priliku da zasnuje radni odnos 2010. godine, kada su zaposleni muški članovi šehidskih porodica, dobio je i Elvis Mušanović. Prije posla u Rudniku dugi niz godina radio je kod privatnika i kako kaže razlika je ogromna.



Meni je ovdje više nego dobro, svako zna svoj dio posla i radi se bez pritiska, mirne glave. Električar sam po struci i radim na održavanju bagera u Turiji. Većih problema sa opremom nemamo, osim redovnog održavanja i nešto manjih kvarova. Do sada je naša služba rješavala svaki kvar u vrlo kratkom roku. Mi smo kao jedna porodica koja radi u zajedničkom interesu osam sati dnevno – kazao je Mušanović.

Poslovođa mašinskog održavanja PK „Turija“ Emin Šabanović još četiri godine dio je ovog kolektiva, nakon čega odlazi u zasluženu penziju. Davne 1981. godine dobio je posao u Rudniku na mjesto fizičkog radnika da bi svoj radni status kroz učenje i naporan rad godinama unapređivao. Prošao je kroz mnoge faze razvoja Rudnika pa su tako i utisci različiti.

Poslije rata na nivou Rudnika bila su četiri kamiona koja su samo održavala proizvodnju, nešto kasnije nabavljeno je još 5, koji su unaprijedili proizvodnju i Rudnik postepeno vraćali u život. Danas na dva površinska kopa

radi ukupno 24 kamiona. Svi oni su u funkciji uz redovna održavanja. Moram reći da imamo sposoban tim ljudi koji u svakom momentu može riješiti sve kvarove. Iskreno da vam kažem, ja se ni ne sjećam kada je neko sa strane došao da nam pomogne u tome. Bez problema se upuštamo i u malo veće projekte kao što je montaža kamiona. Cilj naše službe je da svaki posao odradimo kvalitetno, do kraja i u zadatom roku – rekao je Šabanović.



#### PRIJEM NOVIH RADNIKA U RMU „BANOVIĆI“ D.D. BANOVIĆI

# 244 RADNIKA POZVANA NA LJEKARSKE PREGLEDE

Uprava RMU „Banovići“ d.d. Banovići nedavno je raspisala javni konkurs za prijem novih radnika u radni odnos na određeno vrijeme. Konkurs je raspisan prije svega zbog planiranog povećanja obima poslova, ali i redovnog godišnjeg odlaska zaposlenika u penziju.



Na adresu Rudnika stiglo je više od 1.600 prijava, koje je po okončanju javnog konkursa razmatrala formirana Komisija za prijem radnika. Nepotpune i neblagovremene prijave nisu uzete u razmatranje.

Bodovanje pristiglih prijava vršilo se isključivo na osnovu utvrđenih kriterija po kojima su prednost imali pripadnici određenih grupacija: šehidske porodice, porodice poginulog radnika, ratni vojni invalidi, demobilisani borci i socijalni slučajevi. Također, bodovao se i broj članova u domaćinstvu, dužina vremena provedenog na birou za zapošljavanje, intervju i rezultata obavljenog psiho testa.

Nakon okončanja konkursnih procedura na detaljne ljebarske preglede pozvana su 244 kandidata. Termini ljebarskih pregleda, kao i konačan rezultat konkursa biće objavljeni naknadno.

USAGLAŠENI STAVOVI FINANSIRANJA TERMoeLEKTRANE U BANOVIĆIMA

# KONZORCIJ ICBC BANAKA I DALJE NUDI NAJPOVOLJNIJE USLOVE

**D**elegacija rudnika „Banovići“ tokom maja boravila je u Kini na dogovorenim sastancima sa kineskim bankama. Razmatrana su ključna pitanja vezana za finansiranje izgradnje Termoelektrane u Banovićima. U maratonskim razgovorima sa šest banaka najpribližniji stavovi usaglašeni su sa konzorcijem banaka ICBC.

Na sastanku su dogovorene bitne stavke Ugovora. Kinezi su odustali od prvobitno traženog ugovora za trgovinu strujom koji se odnosio na prodaju struje unaprijed, od hipoteke objekata, kao i od državne garancije za finansiranje projekta. Dovoljno je da garanciju da samo Vlada FBiH. Predstavnici Rudnika za uzvrat prihvatili su otvaranje dva računa za trgovinu strujom kojima će moći raspolagati uz dogovor sa kineskim bankama. Kao garancija za redovne finansijske isplate na računima će u svakom momentu biti novčani iznos u visini od dvije kreditne rate.

Stavka Ugovora koja još uvijek nije usaglašena, a koju će sa Kinezima dogovarati Federalna Vlada i Ministarstvo finansija, odnosi se na isplatu novčanih sredstava ukoliko dođe do problema na projektu izgradnje Termoelektrane. To bi se pitanje trebalo riješiti početkom mjeseca juna da bi se nakon toga, po ranijem dogovoru Ugovor mogao parafirati 12. juna u Peking.

Nakon parafiranja, a prije zvaničnog potpisivanja Ugovora o finansiranju termobloka potrebno je prikupiti saglasnosti od Ministarstva energije, industrije i rudarstva, Ministarstva finansija, Vlade FBiH, Parlamenta FBiH, te Skupštine dioničara Rudnika. Okončanje procedure i potpisivanje Ugovora planirano je tokom mjeseca avgusta nakon čega bi kineska kompanija trebala započeti projektovanje termobloka. Završetak projektovanja kao i pribavljanje građevinske dozvole predviđeno je do maja naredne godine nakon čega će uslijediti povlačenje novčanih sredstava iz kineskih banaka.

Ugovor će biti na snazi narednih 15 godina, od čega 4 godine grejs i 11 godina otplatnog perioda.

Dogovori o finansijskoj konstrukciji privode se kraju, a u međuvremenu se finaliziraju i pripremni radovi na terenu. Urađena je nivelacija terena predviđenog za Termoelektranu na kojem se trenutno odvijaju geomehnička bušenja, a po završetku ispitivanja zemljišta pristupit će se ograđivanju prostora. Ovim aktivnostima Rudnik će osigurati sve potrebne uslove za ulazak kineske kompanije na teren i zvanični početak gradnje Termoelektrane u Banovićima.



NEKADAŠNJI GIGANT METALNE INDUSTRIJE U PUNOM SJAJU SE VRAĆA NA TRŽIŠTE

# TTU „ENERGETIK“ ISPORUČIO PRVE PROIZVODE



**T**vornica transportnih uređaja „Energetik“ d.o.o. Tuzla prošle sedmice završila je svoje prve poslove. Prva tri grabuljasta transportera isporučena su rudniku „Zenica“ u ugovorenom roku. Isporuka je zasnovana na ranije potpisanoj Ugovoru o nabavci grabuljastih transportera za potrebe rudnika „Zenica“, „Breza“ i „Kakanj“. U toku ove sedmice bit će ispušten još jedan grabuljasti transporter, a isporuka preostalih 20 teći će u skladu sa dogovorenim vremenskim rokom.

Od pokretanja preduzeća ugovori se nižu jedan za drugim a posljednji, ujedno i najveći do sada, vezan za izradu trakastih transportera sklopljen je sa tri rudnika (RMU „Abid Lolić“, RMU „Breza“ i RMU „Zenica“). Vrijednost ugovora doseže 4,2 miliona KM, što je dobra satisfakcija za dalji razvoj preduzeća.

Uporedo sa provedbom pomenutih ugovora radi se i na nizu drugih poslova, a neki od njih su već završeni. Tako je rudnik „Banovići“ među prvima dobio reduktor za potrebe površinske eksploatacije, kao i pojedine rezervne dijelove.



Tragom dobrih vijesti koje smo ovih dana mogli čuti u svim medijima o pokretanju proizvodnje u TTU „Energetik“ situaciju smo provjerili na licu mjesta.

Da je nekada zapuštena fabrika doživjela naglu preobrazbu moglo se vidjeti još na samom ulasku. Tokom posjete ovom preduzeću razgovarali smo sa čelnim ljudima TTU „Energetik“- a, a šef proizvodnje Admir Borogovac poveo nas je u obilazak kroz radionice u kojima se radilo na izradi transportera.

Objasnio je trenutne aktivnosti i prisjetio se stanja u kojem su firmu zatekli po samom dolasku. Činilo se da nema osnove za pokretanje bilo kakvih poslova. Proizvodni pogoni bili su bez vode, struje i grijanja.

Uz maksimalnu angažovanost već početkom godine krenulo se u osposobljavanje preduzeća i sticanje uslova za prve radove. Vrlo brzo započeti su prvi poslovi ali i prijave na tendere.

Poslovi su zahtijevali i angažovanje prvih radnika, što je bilo i goruće pitanje prije osnivanja preduzeća. U početku bilo je 50-ak uposlenih od kojih 40 bivših radnika TTU-a.

Povećanim obimom poslova stvorila se prilika za prijem novih radnika. U ovom momentu preduzeće broji 84 uposlenika od kojih je 68 bivših radnika TTU-a. Trenutni raspored radnika i obim poslova podređen je kvaliteti proizvoda i poštivanju vremenskih rokova.

Od polovine marta kada je preduzeće zvanično počelo sa radom do danas uspostavljene su brojne saradnje sa kupcima, ali i dobavljačima. Potencijalni kupci i partneri dolaze kako sa domaćeg tako i sa ino tržišta.

U cilju proširenja tržišta i većeg izvoza proizvoda obavljaju se posjete rudnicima na području FBiH radi usaglašavanja potreba kupaca za proizvodima i mogućnostima proizvodnje istih.



**Almir Zulić, direktor TTU „Energetik“ d.o.o. Tuzla:**

Isporuka prvih proizvoda TTU "Energetik" - a predstavlja potvrdu pravog poteza osnivanja preduzeća, ali i spremnosti Društva da odgovori obavezama preuzetim po osnovu ugovora. Drago mi je da smo došli u fazu kada samostalno i slobodno stupamo na tržište koje iskazuje velike potrebe za našim proizvodima. Sva

pozitivna dešavanja oko TTU „Energetik“-a važna su za sve one koji su vjerovali i dali svoj doprinos ovom projektu koji rješava niz gorućih pitanja: kvalitetne domaće podrške Elektroprivredi i rudnicima, jačanju industrije BiH i šire, te osiguravanju novih radnih mjesta. Kvalitet je oduvijek bio i ostat će glavna referenca TTU-a, nadamo se da će to prepoznati, prije svega, domaći kupci koji su u odsustvu kvalitetnog domaćeg proizvođača većinu svojih potreba zadovoljavali uvozom proizvoda visoke cijene.

**Razija Begić, direktorica za potporu TTU „Energetik“ d.o.o. Tuzla:**

- Danas, kada su iz firme otpremljeni prvi i značajni proizvodi može se slobodno reći da je osnivanje TTU „Energetik“ pozitivan, značajan i veliki korak učinjen od strane osnivača ovog Društva. Na ovaj način pokrenuta je metalna industrija u Tuzlanskom kantonu i stvorena prilika da se bivši gigant vrati u život kao i njegov značaj za privredu BiH i cijelog regiona. U kratkom periodu od našeg osnivanja do danas primijetan je značajan interes kupaca proizvoda, ali i dobavljača repromaterijala. Smatram da će ovo Društvo vrlo brzo opravdati svoje postojanje, što već sad dokazuje uspješnim startom.

**„NAJBOLJI U PRIVREDI TK – KRISTAL SOLI 2016“**

## SPECIJALNO PRIZNANJE RUDNIKU ZA ULAGANJE U RAZVOJ PRIVREDE KANTONA

**M**anifestacija „Najbolji u privredi TK – Kristal soli 2016“ 19. maja organizovana je u hotelu „President“ u Tuzli. Jedan od najznačajnijih privrednih događaja okupio je mnogobrojne privrednike i predstavnike najboljih kompanija s ciljem da se promoviše poduzetništvo, ekonomski potencijali i cjelokupna privreda Kantona.

Manifestaciju je otvorio premijer TK Bego Gutić. U svom govoru izrazio je zadovoljstvo što je u novom pozitivnijem privrednom ambijentu moguće birati od dobrih bolje.

Mjesecima unazad stručni žiri iz ove oblasti sumirao je prošlogodišnje rezultate velikog broja kompanija, te nakon ekonomske analize dao svoj sud odabравši 11 najboljih preduzeća.

Među najboljima našao se i RMU „Banovići“ koji je na ovoj manifestaciji predstavljen kao sinonim uspješnog poslovanja što je potkrijepljeno i prigodnom nagradom, kristalom i plaketom „Specijalno priznanje za ulaganje u razvoj privrede TK“. U ime Rudnika nagradu je preuzeo izvršni direktor za ekonomske poslove Almir Delić.

- Ovo je zasigurno nagrada svim zaposlenicima Rudnika i dodatni motiv za još bolje, uspješnije i ambicioznije poslovanje. Drago mi je da je rad, trud i kvalitet ponovo na cijeni - tokom svog obraćanja kazao je Delić.



ZAŠTIĆENI PEJZAŽ „KONJUH“

# STRANCI SPREMNI ULAGATI U OČUVANJE BANOVIĆKOG OKOLIŠA



Dolaskom proljeća i lijepog vremena ponovo su aktivirane masovnije posjete planini Konjuh. Posjetitelji iz cijelog regiona dolaze u obilazak jednoj od najljepših i prirodno najbogatijih bh planina. Zbog svoje neprocjenjive vrijednosti 2009. godine 8.016 hektara planine Konjuh i zvanično je proglašeno zaštićenim pejzažom, u želji da se očuva izvorno stanje i spriječi nesmotreno uništavanje.

U posljednjih osam godina na ovom dijelu urađeno je mnogo. Uređeni su pristupni putevi do planine Konjuh, biciklistička staza, tereni za sportsko – rekreativne aktivnosti, posebna mjesta za izletnike sa izgrađenim šadrvanima. U toku su aktivnosti na osposobljavanju prilaza do pećine Studešnice, te uređenje vodopada. Nastojat će se proširiti ponuda i omogućiti posjetiteljima da prohodnim putevima i u prijatnijem okruženju stignu na mnogobrojne destinacije planine Konjuh.

U isto vrijeme radi se i na proučavanju flore i faune ovog područja, gdje su pronađene vrlo rijetke vrste biljaka i životinja. Među njima je Planinski djetlić, vrsta ptice neuobičajna za ovo podnevlje koja se nalazi na svjetskoj crvenoj listi zaštićenih vrsta. Rijetkom vrstom smatra se i Lombardijska žaba za koju do sada nije bilo saznanja da je nastanjena na prostoru BiH. Uzorci poslati na DNK analizu zvanično će potvrditi da li se radi o pomenutoj vrsti.

Iako je planina Konjuh tek jednim dijelom istražena dosadašnji pronalazak rijetkih vrsta biljaka i životinja dokaz je da se radi o pogodnom istraživačkom tlu. Bogastvo krajolika i nedovoljno istražen teren izazov su i za inostrane stručnjake iz ove oblasti.

Zainteresovanost i potencijal za napredak postoji. Potrebno je što prije preduzeti aktivnosti na daljem unapređenju prostora. Nadležni iz Javne ustanove „Zaštićeni pejzaž Konjuh“ redovno apliciraju za

prikupljanje novčanih sredstava i provedbu projekata koji će doprinijeti očuvanju bogastva planine Konjuh.

- Značajno je spomenuti da su do sada provedeni brojni projekti i da je u toku realizacija vrlo bitnog stručnog projekta koji se finansira iz Fonda zaštite i okoliša Federacije BiH, a kojim se nastoji dokazati osnovanost proglašenja zaštite kao i povećanja stepena zaštite. Ovo bogastvo na našoj planini sigurno treba više istražiti, zaštititi i sačuvati od uništenja – kazao je direktor JU „Zaštićeni pejzaž Konjuh“ Enes Modrić.

Aktuelan je i projekat koji se provodi u saradnji sa Italijanskom vladom vrijedan 1,4 miliona KM, a koji će trajati naredne tri godine. Cilj projekta je poboljšati stanje zaštite i upravljanja zajedničkim dobrom, promovisati razvoja turizma kroz poboljšanje infrastrukture i usluga, te jačati svijesti lokalne zajednice o značaju i vrijednostima zaštićenog pejzaža.

Uz očuvanje i nadogradnju vrijednosti koje imamo, u dogledno vrijeme, s pravom se možemo nadati da će bar jedan dio planine Konjuh biti proglašen Nacionalnim parkom i imati puno veći stepen zaštite.





FOTO – SAFARI PARNIH LOKOMOTIVA

# BANOVIČKI RARITETI ATRAKCIJA ZA DOMAĆE I STRANE POSJETIOCE

Centar za zaštitu, razvoj i promociju turizma i Udruženje „Bosanski kolosijek“ 06. maja u Banovićima organizovali su jedan nesvakidašnji događaj. Prvi put za sve ljubitelje željeznice upriličen je foto – safari parnih lokomotiva serije 25, 55 i 83, koje datiraju iz 1940-tih godina, a u vlasništvu su rudnika „Banovići“.

U ranim jutrnjim satima na željezničkoj stanici Separacije okupio se veliki broj ljubitelja lokomotiva iz cijelog regiona. Stigli su posjetitelji iz Hrvatske, Srbije, Slovenije, ali i veliki broj posjetitelja iz BiH koji su prvi put u ovom gradu. Neki su došli isključivo zbog fotografisanja jednih od najstarijih i jedinstvenih lokomotiva u svijetu, dok su se drugi prepustili čarima vožnje životopisnim krajolikom.

- Banovići imaju ono što niko drugi nema, tri parne lokomotive uzanog kolosijeka koje su još uvijek u funkciji. Događaj smo organizovali besplatno sa ciljem da promovišemo Banoviće, Rudnik i željeznice. Također, na ovaj način nastojimo da podignemo nivo zaštite industrijskih rariteta i ove dragulje spasimo od propadanja - kazao je Dževad Hodžić predsjednik Udruženja „Bosanski kolosijek“.

Uz prvi zvižduk lokomotive putnici su pohrlili ka ulazu u vagone, a ljubitelji dobre fotografije zauzeli najbolje pozicije sa kojih će zabilježiti posebnu reviju banovičkih industrijskih ljepotica.

- Zaljubljenik sam u lokomotive još od malih nogu, kada sam sa tatom redovno odlazio na vožnje vozom, ali ovakvih lokomotiva u Zagrebu nažalost više nema. Iskreno sam se



radovao dolasku u Banoviće i drago mi je što imam priliku uživati u predivnim prizorima i mogućnostima ovog grada – kazao je Boris Kržić posjetitelj iz Zagreba.

Mirsad Mujanović iz Travnika također je jedan od učesnika foto safarija. Prvi put snima ovakav događaj sa željom da ostavi kvalitetan trag u vremenu, bilježeći zanimljive umjetničke i dokumentarne fotografije. Nije ostao imun na ovako rijetku turističku ponudu i kako kaže, već odavno emotivno je vezan za željeznice. Njegov otac bio je kondukter u jednoj od ovakvih lokomotiva, Čiri koji je saobraćao na relaciji Lašva – Jajce.

Događaj je privukao mnogo pažnje kako turista tako i medija. Neosporno je da će se i dalje pisati o turističkim potencijalima Banovića koji su svrstani na sami vrh svjetske ponude željezničkog turizma.



ZAVRŠEN PROCES ARHIVIRANJA MATERIJALA I DOKUMENTACIJE RUDNIKA

# U NAJAVI I DIGITALIZACIJA ARHIVSKE GRAĐE



Nešto ranije pisali smo o započetim radovima na uređenju prostora za smještaj kompletne arhivske građe i dokumentacije Rudnika koju je Zakonom nužno arhivirati. U posljednje dvije godine urađen je veliki posao. Iz pogona gdje je do sada bila smještena arhiva u novi prostor prevezeno je više od 20.000 registratora arhivske građe.

Stara upravna zgrada Čubrić lokacija je u kojoj je uređena, prepakovana, registrovana i u savremene pokretne ormare posložena postojeća arhiva. Takođe u skladu sa Zakonom prošle godine Arhivu TK predato je 100 metara arhivskog materijala.

Da Rudnik danas ima jednu od najuređenijih i najsigurnijih arhiva potvrdio je i Emir Rahmanović rukovodioc Službe za opšte poslove koji rukovodi i ovim aktivnostima.

Što zbog zakonske obaveze što zbog očuvanja bitnih materijala i dokumenata Rudnika koji u svakom momentu trebaju, radili smo na osavremenjavanju arhive i uređenju arhivskog prostora. Uloženi su veliki napori ali i finansijska sredstva. Stiču se uslovi za početak procesa digitalizacije, koja bi pomogla u procesu pronalaženja i korištenja arhivske građe, ali i većem stepenu sigurnosti i očuvanja - kazao je Emir.

Za razliku od većine arhivskih prostora rudnička arhiva smeštena je u suhu, prozračnu i osvijetljenu prostoriju što je velika prednost za očuvanje kompletne arhivske građe.



JU „BIBLIOTEKA” BANOVIĆI

## U SKLOPU BIBLIOTEKE I RADIONICA ZA NAJMLAĐE

JU „Biblioteka” Banovići u avgustu 2013. godine pokrenula je program “Čitam i igram se” zasnovan na kreativnom pristupu čitanja, učenja i navike boravka u biblioteci, a za krajnji cilj je pripremanje mališana za školske obaveze. Program se odvija u novim prostorijama Centra kulture i informisanja po modelima koji su prilagođeni djeci uzrasta od 3 do 6 godina.

Kroz kreativno edukativne radionice djeca rade na vizuelnom učenju, crtanju i bojenju te tako usvajaju i prepoznaju likove i njihove karakterne osobine.

Biblioteka je oživjela jednu sjajnu ideju, kojom se djeci ukazala važnost igre izvan njihovih domova.

- Naša druženja organizujemo dva puta sedmično u trajanju od jednog sata. Svi mališani ujedno su članovi biblioteke i imaju pristup velikom broju knjiga prilagođenom njihovom uzrastu - rekla je Amra Smajlović voditeljica dječije radionice.

Spomenula je da biblioteka posjeduje zavičajnu zbirku koja njeguje i čuva knjige sa potpisom banovičkih autora.



BAYERN TROPHY CUP 2017

# Iskustvo i prilika ZA VELIKE REZULTATE



Dječaci uzrasta do 10 godina fudbalskog kluba "Budućnost" Banovići u aprilu ove godine imali su priliku posjetiti četvrti tradicionalni turnir u Minhenu pod nazivom Bayern Trophy Cup 2017. Tri dana provedena na fudbalskim terenima udaljenim samo nekoliko kilometara od Allianz Arene velika je privilegija jer na ovakav turnir svjetske razine nije lako doći. Preko sedamdeset fudbalskih ekipa iz cijelog svijeta prodefiliralo je stadionom sa zastavama svojih zemalja. Među njima su bili i naši dječaci koji su pored zastave BiH na dresovima ponosno nosili i grb Rudnika, kao generalnog sponzora kluba dugi niz godina.

U konkurenciji od deset ekipa, momci iz Banovića osvojili su veliko četvrto mjesto. Veličina četvrtog mjesta još je veća uzme li se u obzir da treneri nisu bili u mogućnosti povesti najtalentovanije dječake jer se putovanje plaćalo vlastitim sredstvima. Poznavajući socijalnu situaciju u našoj zemlji, ali i nedostatak sponzora bilo je nemoguće povesti idealan tim.

Na stadion Allianz Arene, kažu, nisu mogli ući ali su

imali tu sreću da pristupe muzeju kluba i vide sve ono što su do sada imali priliku gledati samo na televiziji.

O perfektnim terenima i idelanim uslovima za rad govorili su u jednom dahu. Zaučudili su se kažu i Nijemci bosanskoj volji i želji, bilo im je nepojmljivo da djeca ovog uzrasta pređu put veći od 900 km i s njima rame uz rame zaigraju fudbal.

Grupu u kojoj su igrali činile su uglavnom ekipe dječaka iz Njemačke i jedna ekipa iz Italije koja je na kraju bila i pobjednik turnira.

- Obzirom na kompletnu sportsku situaciju u BiH, mogu reći da posjedujemo nadprosječan kvalitet, a to smo pokazali i na turniru nadigravši ekipe iz dosta razvijenijih zemalja. Iako su mnogo organizovaniji, finansijski bolje stoje i više ulažu u nogomet, naša volja i bosanski mentalitet dali su pozitivne rezultate - rekao je trener ekipe Muris Čekmić.

Pored mališana predstavnika zemalja koje važe za fudbalske velesile, turniru su prisustvovala i naše komšije iz Srbije i Crne Gore.

Ono što je možda većini nepoznato jeste da je ekipa „Budućnost“ ovog uzrasta prošle godine bila pobjednik jednog međunarodnog turnira. Turnir se održao u Poljskoj i prema riječima trenera Čekmića bio je mnogo jači, sa više ekipa i većom konkurencijom. Ipak, na kraju su banovićki dječaci podigli pehar i stadionom se orila himna BiH.

Mjesto gdje se okupljaju najveća imena današnjeg fudbala veliko je iskustvo, ali i prilika da se uoče mladi talenti koji bi, ako se dobro pokažu, mogli zaigrati van granica ove države. A u ovoj generaciji takvih je mnogo.



DOBROVOLJNO DARIVANJE KRVI

# NASER KUKIĆ VLASNIK PLAKETE "ZLATNI ZNAK" CRVENOG KRIŽA FBiH



Naser Kukić na prvi pogled je običan čovjek. Nadzornik Lampare podzemne eksploatacije uglja, oženjen i otac dva sina. Ono što je neobično, a vezano je za njega, jeste njegov nadimak "čovjek zlatnih ruku". Nadimak je dobio zbog redovnog učešća na dobrovoljnim akcijama darivanja krvi.

Krv je darovao 118 puta što je evidentirano u Crvenom križu Federacije, ali i još 30 puta po pozivu u kriznim situacijama. Već 40 godina darivaoc je krvi najmanje tri puta godišnje što u prevodu znači 40 spašenih života.

- Prvi put krv sam dao sa 16 godina iz čiste radoznalosti, a kasnije prvobitno iz humanih razloga ali i zbog redovne kontrole svog zdravlja - rekao je Naser Kukić.

Radnici Rudnika svake godine odazovu se akciji dobrovoljnog darivanja krvi u organizaciji Crvenog križa Banovići i saradnji sa Poliklinikom za transfuziologiju UKC Tuzla. U ovoj godini organizovana je akcija u kojoj je učestvovalo 147 darivalaca, što je ujedno i rekordan broj za radnike Rudnika. Crveni križ FBiH organizuje druženja i dodjelu priznanja onima koji su krv dali preko 50 i 100 puta. Naser je jedini vlasnik plakete "Zlatni znak" na našoj općini.

- Ova plaketa mi znači mnogo. Drago mi je što ljudi znaju cijeniti to što radiš za druge, a zahvaljujući tome i ja imam mnoge povlastice - kaže Kukić.

Svoje plakete dobili su i oni koji su krv dali 50 i više puta. Vlasnici srebrne plakete su: Nijaz Čolić, Mirsad Šahinović, Ifet Hasić, Fikret Sarić, Omer Huremović, Nermin Avdić, Amir Balkić i Mevludin Hasikić.

Po ko zna koji put rudari zaslužuju dubok naklon i iskrene čestitke, jer pored teškog posla koji časno obavljaju, redovno i otvorenog srca odazivaju se svim humanitarnim akcijama.



RUDAR informativna novina radnika  
RMU "Banovići" d.d. Banovići

**Uređuje redakcioni odbor:**

Samir Numanović, predsjednik  
Amela Kantić, urednica  
Melisa Čaušević, novinar- saradnik  
Fertik Glibanović  
Amir Halilčević  
Salko Gutić  
Šehval Lapandić

**DTP i štampa:** "OFF SET" Tuzla

Riješenjem Republičkog komiteta  
za Informacije broj 04-651-537/77  
od 6.9.1977.  
List je uveden u Registar Štampe R BiH.

E-mail: kontakt@rumb.ba  
nadzorni.odbor@rumb.ba

www.rmub.ba

